

2. december 2003

UKA 2003/174

**Aalisarneq pillugu Inatsisartut inatsisaata allanngortinneqarnera pillugu  
Inatsisartut inatsisissaattut siunnersuut**

**pillugu**

**Inatsisartut Aalisarnermut, Piniarnermut Nunalerinermullu  
Ataatsimiititaliaata**

**ISUMALIUTISSIISSUTAA**

**Inatsisissatut siunnersuutip aappassaaneerpeqarnerani saqqummiunneqartoq**

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini ukuningga inuttaqarpoq:

Inatsisartuni ilaasortaq Ole Dorph, (siulittaasuugallartoq)  
Inatsisartuni ilaasortaq Ruth Heilmann, Siumut  
Inatsisartuni ilaasortaq Finn Karlsen, Atassut  
Inatsisartuni ilaasortaq Agathe Fontain, Inuit Ataqtigiit, sinniisusaaq  
Inatsisartuni ilaasortaq Per Skaaning, Demokraatit, sinniisusaaq

Inatsisartut Aalisarnermut, Piniarnermut Nunalerinermullu Ataatsimiititaliaata UKA 2003-mi siullermeerinerup kingorna Aalisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut nassuiaatillu misissorpaa.

**Tusarniaanermi akissutisiat**

Siunnersuutip matuma ataatsimiititaliami suliarineqarnissaanut atugassatut tusarniaanermi akissutisiat nuutinneri ataatsimiititaliap piniarpai. Kattuffiit, oqartussaasut suliffeqarfiillu uku tusarniaavigineqarsimasut ataatsimiititaliap

paasivaa: APK, KNAPK, Royal Greenland A/S Politimestereqarfillu. Royal Greenland A/S Politimestereqarfillu tusarniaarnut akissuteqarsimangillat.

### **Siunnersuutip imarisai**

Naalackersuisut Aalisarneq pillugu inatsisartut inatsisaat nr. 18 ulloq 31. oktober 1996-imeersoq allanngortinneqassasoq siunnersuutigaat, tassani § 5, imm. 3-mi oqaaseq atorteqartoq "TAC" oqaatsimik "pisassiissutit-"nik taarserniarneqarluni. Taamaalliluni § 5, imm. 3 ima oqaasertaqalissaaq:

" *imm. 3.* Kalaallit Nunaata Kitaani raajanut pisassiissutit agguanneqarnerani sinerissamut qanittumi aalisariutinut 43%-i avataasiortunullu 57% tunniunneqartassaaq."

Naalackersuisut § 5, imm. 1 naapertorlugu imartani kalaallit Nunaata oqartussaaffigisaani aalisakkanik assigiinngitsunik TAC-mik agguaassinisamut piginnaatitaanerisa aammalu Kalaallit Nunaata Kitaani raajartassanik § 5, imm. 3 naapertorlugu procentinngorlugu agguaasseriaatsip akornanni inatsimmi maanna atuuttumi oqaasertalersuineq qanorlu paasinninnisaq nalornisoorutaasasinnaasorinarpoq.

Naalackersuisut piffissap isumaqatigiissusiorfisup qiteqqunnerani EU-mut Athenimi isumaqatigiinniarnerninut atatillugu qanoq paasinninnissap paatsuunganarsinnaanera maluginiarsimagaat ataatsimiititaliap paasivaa, tamannalu tunngavingalugu aalajangersagaq maanna erseqqissarniarneqarpoq.

Naalackersuisut Kitaani 4000 tons-inik EU-mut raajatassiinissamut ilumut piginnaatitaaffeqarnerisut pillugu Naalackersuisut kiisalu APK KNAPK-lu inatsisit tungaannit isigalugu nassuiaasiortitsisimapput.

Inatsisit tungaannit isigalugu nassuiaatitut Naalackersuisunit pissarsiarineqartukkut uppersararneqarpoq, Naalackersuisut § 5, imm. 1-ip oqaasertaligaanera naapertorlugu imartami Kalaallit Nunaata oqartussaaffigisaani aalisagaqatigiiaanik aalajangersimasunik TAC-mik agguaassinissamut piginnaatitaasut. Tamanna aamma raajanut atuuppoq. Aammattaaq Naalackersuisut TAC-mik kalaallinut kalaaliunngitsunullu pisassiisinaanermut piginnaatitaapput.

Inatsisit tungaannit isigalugu nassuiaatitut APK-mit KNAPK-millu pissarsiarineqartukkut Naalackersuisut Kalaallit Nunaata Kitaani raajartassanik agguaassinnaanermut tunngatillugu piginnaatitaaffeqarnerat akerlilerneqarpoq, aalisarnermummi inatsimmi § 5, imm. 3-mi immikkut aalajangersakkakut naliginnaasumik piginnaatitaaffeqarnek § 5, imm. 1-imi annikillisinneqarmat.

Pissutsit taamaanneranni ataatsimiititaliap inatsisitigut paasinninneq sorleq eqqortuunersoq soorunami naliliiffigisinaanngilaa. Tamanna eqqartuussivitsigoortumik aalajangiinermik tunngaveqartariaqarpoq.

Ataatsimiititaliami amerlanerussuteqartut Siumumeersut Inuit Ataqtatigiinneersullu Aalisarneq pillugu Inatsisartut inatsisaata allanngortinneqarnera pillugu Inatsisartut

inatsisissaattut siunnersuut ilassilluarpaat. Amerlanerussuteqartut Naalackersuisutulli isumaqarput aalisarneq pillugu inatsimmi § 5, imm. 3-p erseqqissarneqarnissaa pisariaqartoq, taamaalilluni siunissami nunanik allanik aalisarnikkut isumaqatigiissuteqartoqartillugu Naalackersuisut aalisarneq pillugu inatsimmi § 5, imm. 1 naapertorlugu kalaallinut kalaaliunngitsunullu TAC agguarlugu pisassiinnaanerannut qanoq annertutigisumik pisinnaatitaaffeqarnerat nalornissutaqqunagu.

Siunnersuut akuersissutigineqassappat Naalackersuisut aalisarnermi kattuffinnit eqqartuussivimmuq suliaqatigiissutigineqarsinnaanerit aarleqqutigineqarsinnaasoq ataatsimiititaliap ilisimavaa. Ataatsimiititaliamili amerlanerussuteqartut maluginiarpaat inatsimmik allanngineq piginnaatitaaffinnik piaaffiginnertut isigineqassagaluarpas aningaasatigut kinguneqaataasinnaasut pilugit nassuiaammik siunnersuut ilaqartinneqanngitsoq. Tamanna ataatsimiititaliami amerlanerussuteqartunit ima paasineqarpoq; Naalackersuisut inatsisitigut sukumiisumik nalilersuereernertik tunngavigalugu naliliisut aalisarnermi kattuffiit eqqartuussivikkut suliaqatigiissuteqaraluarunik ilaleneqarsinnaassanngitsut. Aammattaaq ataatsimiititaliami amerlanerussuteqartunit ilimagineqartariaqarpoq - inatsisit tungaannit isigalugu nassuiaat tunngavigalugu inatsisitigut nalilersuineertik Naalackersuisut ingerlassimassappassuk - inatsisit tungaannit isigalugu nassuiaammik inerniliunneqartut attanneqarsinnaanngitsut paasinarsippat siunnersortimik akisussaatisinnaanermut periarfissat Naalackersuisunit isumaliutigineqareersimassasut.

**Siuliani allassimasutut oqaaseqaateqarlutik amerlanerussuteqartut Aalisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuutip akuersissutigineqarnissaa inassutigaa.**

Ataatsimiititaliami ikinnerussuteqartoq Atassummeersoq siunnersuut ima oqaaseqarfigissavaa:

Aalisarneq pillugu inatsimmi § 5, imm. 3-mik nutarterinissamik Naalackersuisut kissaataat piffissap isumaqatigiissusiorfisuq qiteqqunnerani EU-mik isumaqatigiinniarnersa kingunerisaannik pivoq, tamatumai isumatiginniarnert kingunerisaannik EU-p Kalaallit Nunaata Kitaani raajartassai 4000 tonsinik ilaneqarput.

Nunatta kitaani raajartassat amerleqqinnissaat maannakkut aalisarneq pillugu inatsimmi § 5, imm. 3-mi allassimasut malillugit piginnaatitaaffinnik piaaffiginninnerusoq alisarnermi kattuffinnit oqaatineqarpoq. Ikinnerussuteqartup taama paasinninneq isumaqatigaa, siunnersuutillu ilaleneqannginnissaa kaammattuutigalugu.

Ataatsimiititaliami ikinnerussuteqartoq Demokraatineersoq § 5, imm. 3-mi oqaatsip "pisassiissutit" atorneqarani "TAC"-p atorneqarneranik Naalackersuisut

naleqquttuunginneraanerannik isumaqatigai. Taamaattumik siunnersuummi anguniarneqartut Demokraatit isumaqatigaat.

Taamaattoqarsimanngikkaluarpat, EU-mik isumaqatiginninniarnert ajornartorsiutitaqarnannginnerusumik ingerlasimassagaluartut takorloorneqarluarsinnaavoq.

Demokraatilli isumaqarput inatsisinut tunngasunik aalisarnermi kattuffinnik saqitsaassuteqarnissaq pinaveersaarniarlugu, inatsisip allangortinneqarnissaanik siunnersuut ulloq 1. januar 2006 aatsaat atuutitilerneqartariaqartoq.

**Siuliani allassimasutut oqaaseqaateqarlutik ikinnerussuteqartut**  
**Atassummeersut Demokraatineersullu Aalisarneq pillugu Inatsisartut**  
**inatsisaata allangortinneqarnera pillugu Inatsisartut inatsisissaattut**  
**siunnersuutip itigartitsissutigineqarnissaa inassutigaa.**

Taama oqaaseqarluni Inatsisartut Aalisarnermut, Piniarnermut Nunalerinermullu Ataatsimiititaliaata Aalisarneq pillugu Inatsisartut inatsisaata allangortinneqarnera pillugu Inatsisartut inatsisissaattut siunnersuut aappassaaniigassanngortippaa.

Ole Dorph  
Siulittaasuugallartoq

Agathe Fontain

Ruth Heilmann

Finn Karlsen

Per Skaaning